

2 KOLINITA

Faulo yana kiluma 'ana veluga me Kolinita 'waidie.

De'e letanina Faulo i kiluma-vaitugana me Kolinita 'waidie 'atamana Masidonia 'wainega. Kolinita tamu 'atamana 'ana wagava bwaikina 'awalawa Akaia 'alo Gulisi nageneye.

We'e nagami Faulo i kilumaga me Kolinita i yagaidi, mulieta tamu tutuya Taito i vetunei, i na 'asetadi bega i na vilai i na mai i na veifufu. Taito i vilai i mai i veifufu i vo, Me Kolinita Faulo bonana i nogai 'akonadi i nuaviladi, we'e 'ifwaidi i baila kebu nuanuadi Faulo yana veimea.” De'e letanina nageneye nani bwaikidi 4 i 'eno'enovi. Nagami, Faulo i sosoana tomotoganidi i nuaviladiga faifaidi, wata Vala 'Atumaina Iesu Keliso 'ana nuanua nageneye mogitana faifaina i tolinuata'i. We'e 'ana vetonu i vonedi yadi 'anivelena-maimaiga i na yato tovetumagana i vewekowekomaga faifaidi. 'Ana ve 4, i kiavemageta 'waidie taunina mogitana tomata'aulele. De'e letanina 'ana 'idi side bani'odi.

Vona-vekaiwa me Kolinita 'waidie wata Yaubada 'ana subia. 1:1-11

Me Kolinita Faulo i kiavenuavitai we'e Faulo nuanuana i na veianedi. 1:12-2:13

Faulo yana folova mogitana vetolu'ivona Yaubada yana Veakutagona 'Ivauna faifaina. 2:14-6:10

Faulo 'ana lautonova me Kolinita faifaidi i lu'ivoneyeni. 6:11-7:16

'Anivelena-maimaiga 'ana 'idewadewa taunidi
yadi nuanuayega faifaina. 8:1-9:15

Faulo i veifufu yana vetomata'aulele me 'adi
'eba 'isa. 10:1-12:21

Faulo yana nuanua, yana velu'ase'ase wata
yana 'alanuai. 13:1-13

1 ✧Emavo, yau Faulo iada Timoti taiadi 'a
vekaiwa 'waimie. Yaubada nuanuana, bega a
vetomata'aulele Iesu Keliso faifaina, we'e 'omi
Yaubada yana 'Aila'a 'wa miamiani 'atamana
Kolinita 'waineye, kumanimiavo 'wa vetuma-
ganaga Keliso 'waineye wata Yaubada yana to-
motoga matatabumi 'awalawa Gulisi nageneye, a
kilukiluma 'waimie.

2 ✧'A vevelu'ui faifaimi, nuanuama Yaubada
Tamada wata 'ada Toveimea Iesu Keliso ma yadi
nuakalikali i na vevesauluva 'atumaina 'waimie
wata nuanua bikana, mia 'atumaina taiadi i na
vevelele mi.

Yaubada 'ada To'aivaita.

3 ✧Yaubada ta na subisubiai, taunina 'ada
Toveimea Iesu Keliso yana Yaubada wata
Tamana. Taunina Tamada, 'ada To'isanuakalikali,
'aiseotogina 'wainega 'aivaita ta veveluagadi.

4 'Ada vita matatabuna 'waidie i kikiavefa'alida
wata nuada i 'iveagiagidi bega tovetumagana
'ifwaidi vita tulina tulina i na veluagadiga, 'ada
fata ta na 'ivaisedi 'aivaitanidi ta veluagadiga
'waidiega. 5 Vita wata veviga Keliso i veluagadi
faifaidda, 'ida wata bani'odi vita bwaikidi ta
veveluagadi faifaina. Mogitana ta veveluagadi

siwe wata 'aivaita bwaika-falafaladi ta veveluagadi fai Keliso taiadi ta miave'itubama. ⁶ Fai Iesu Valana 'Atumaina 'a lalau'age vita bwaikidi 'a veveluagadi, siwe kebu 'a da veluaga-maimaigidi, fai yama lau'agenidi 'waidiega 'wa vetumagana Iesu Valana 'waineye nika Yaubada i 'ivaisemi wata i 'ita'ita'iemi. Fai Yaubada i 'i'ivaisema vita 'adi tutuye, 'omi wata bani'odi 'aivaita 'wa na veluagadi nuami i na ve'atumai. Mogitana vitanidi 'a veveluagadiga 'omi wata 'wa veveluagadi siwe 'ami 'aivaitanidi 'waidiega Yaubada i na kiavetoketokemi i na nagoga ma yami tokemaiga 'wa na tovoovoi fa'alina. ⁷ 'A nuani mogitana 'wa na tovoovoi fa'alina. Avinodi 'ada vita i vesala, siwe wata 'ada 'aivaita Yaubada 'wainega i vesala.

⁸ ✧Emavo, vita bwaikaotogidi 'a veluagadi 'awalawa Eisia nageneye, nuanuama 'wa na 'asetat-atumaidi. Mogitana vitanidi vitaotogidi 'wa da vo i da akufwasema 'a vo 'ako, 'Wainega 'a na wafa.” ⁹ 'A vebaemaga 'wa da vo mali tomotoga i da veimea 'a na wafa. Siwe vitanidi i souyediga 'waimeye bega kebu taunima yama toketokena 'a na vetumaganeni, we'e mogitana ma yama vetumagana taunima 'a tauyema Yaubada 'aiseotogina 'waineye, 'a na wafaga kebu tamu ava'ai, fai taunina towafa 'adi tosivetovoi. ¹⁰⁻¹¹ ✧Vitanidi 'eba wafa 'waidiega i 'ita'ita'iemaga wata 'awaie i na 'ita'ita'iema. 'Omi 'wa na 'i'ivaisema yami velu'ui 'waidiega, 'a nuani mogitana tutuya matatabuna i na 'i'ita'ita'iema. 'Ai'edi fuemi 'wa na vevelu'ui

faifaima Yaubada yami velu'uinidi i na tutulidi ma yana nuakalikali, i na vesauluva 'atumaina 'waimeye, 'omi wata mali tomotoga 'wa na 'iseni 'wa na vevekaiwa 'waineye yana nuakalikalinina 'waimeye faifaina.

Faulo igodi i da nago Kolinita.

¹² ✧'Ama fata 'a na awa'ai'aima fai 'ama vebae 'waineye 'a lutonovi yama sauluva 'atumaide mali tomotoga matadie we'e mogitana 'omi me Kolinita matamie. Yaubada yana toketokena 'wainega yama sauluva i tonova, kebu 'a da luwanawana sauluva sakoidi wata 'atumaide taiadi. Yama sauluvanidi kebu tomia fwayafwaya yadi nuanua bani'odiga, we'e mogitana Yaubada yana nuakalikali i veveimeyema bega yama sauluva tonovidi. ¹³⁻¹⁴ ✧Yama leta matatabuna 'waimie kebu tamu vona givagivana 'a da kilumiga, we'e mogitana ava'ai 'a kilumiga 'ami fata 'wa na lu'iawawadi wata 'wa na 'asetadi. Tutuya de'e yami 'asetanina i na vevebwaika i na nagoga yama nuanua matatabuna 'wa na 'asetanina 'ada Toveimea Iesu i na vila-vaitugani 'ami fata 'wa na awa'ai'aima, 'ima 'a na awa'ai'aimiga bani'odi.

¹⁵⁻¹⁶ Fai a nuani mogitana nuanuami yau, bega yaku nuanua a 'idewai a vo, A na nunagoga 'awalawa Masidonia, nagami a na nago me Kolinita 'waidie, mulieta yaku lauvivila i na 'a'ava, a na vilaku a na mai wata a na 'isedi. A na miamia, mulieta yadi 'aivaita 'wainega a na tauya

a na nago 'awalawa Iudia.” A vo, De'e bani'odi a na nagoyediga tutuya 'ailuga a na 'isedi, wata tutuya 'ailuga i na sosoana.” ¹⁷ Fai a vo, A na nago me Kolinita 'waidie,” siwe kebu a da wai, voke yami nuanua 'wa vo, Faulo tovekali.” Tomotoga fuedi 'awadi i na vo, E'e, 'a na 'idewai,” siwe yadi nuanua 'waidie i vo, Kebu 'a na 'idewaiga.” We'e yau, kebu bani'odi yaku sauluvaga.

¹⁸ Ava'ai Yaubada i na voneyeniga, mogitana i na 'idewai, 'ima wata bani'odi kebu 'a da vekaliemiga. Nagami 'a vonemi 'a vo, E'e, 'a na 'idewai,” siwe yama nuanua 'waineye kebu 'a da vo, Kebu.” ¹⁹ 'Ima kebu tovekaliga fai Iesu Keliso Yaubada Natuna, kumanina faifaina yau, Sailasa, Timoti taiadi 'a lau'age 'waimie, kebu tovekaliga. Kelisonina i na vo, E'e, a na 'idewai,” we'e yana nuanua kebu tulineamo i da nunago. Ava'ai i voneyediga, matatabuna i na 'idewadi wata 'awaie i na 'idewadi. ²⁰ ✧Yaubada yana vona'awaufaufa fuedi, siwe Keliso 'aitamogana 'aitamogana i 'idewadi. Begaidi Yaubada ta subisubiai ta vo, Vona mogitana, Yaubada i na 'idewadi Keliso 'wainega.” ²¹⁻²² ✧Yaubada 'aiseotogina 'ima wata 'omi yada miave'itubama Keliso 'waineye, 'ana tokiavefa'ala. Wata Yaubada 'aiseotogina i venua'ivineda yana nuanua ta na 'idewadi wata yana tugusa i yatoi 'waideye bega 'ida yana tomotoga mogitana. Tugusanina, 'Anu'anunu 'Atumaina i ageda, yada 'eba 'isa 'awaie 'ada veuveuta ta na veluagadi 'wainega.

²³ ✧Yaubada 'aku to'aseta a vona mogitana

✧ **1:20:** Lom 15:18-19; Ve 3:14 ✧ **1:21-22:** 1 Ion 2:27; Efe 1:13-14; Lom 8:16-17 ✧ **1:23:** Lom 1:9

'waimie kebu a da vekali. Fai a nuanidi yami sauluva kebu 'atumaidiga, yaku lauvivila 'ana tutuye kebu a da wai 'waimie. A da waiga yami sauluva sakoidi a da 'isedi, faifaidi a da awavesakoyemi. ²⁴ ☆'Akonadi 'wa vetumagana Keliso 'waineye 'wa tovofovoi fa'alina, bega kebu nuanuama 'a na veimeyemi 'a na vo, Side naninidi 'waidie 'wa na vetumagana." We'e mogitana 'ima wata 'omi ma fueda ta folofolova yami sosoana faifaina.

2

Faulo tamu yana leta 'wainega me Kolinita i awavesakoyedi.

¹ ☆Basenadi a waiga a awavesakoyemi yami sauluva faifaidi 'wa nuavita. Bega yaku nuanua a vo, Tutuya de'e kebu wata a na nagoga, kebu nuanuaku yaku awavesako 'wainega wata i na nuavita." ² 'Omi 'aku tokiavesosoana, 'ai'edi a da awavesakoyemi yami sauluvanidi faifaidi nuami a da 'ivevitadi nika yau wata a da nuavita. 'Wa da nuavitaga kebu tamu wata aitoi i da miamia bega i da kiavesosoaniku. ³ Begaidi tamu leta a kilumi i wai 'waimie a awavesakoyemi yami sauluva sakoidi faifaidi. I lubwainemi 'wa da kiavesosoaniku bega nuanuaku nagami yami sauluva i na ve'atumai, mulieta tutuyanina a na waiga, kebu a na nuavita a na sosoana faifaimi. 'Omi matatabumi a 'asetami, a nuani mogitana 'ai'edi a na wai ma yaku sosoana a na veluagami, 'omi matatabumi wata 'wa na sosoana. ⁴ ☆Fai

nuanuaku taiadi ta na sosoana ma yaku nuavita wata ma yaku venuafouviga, ma matageuku a kiluma 'waimie. A kilumaga, kebu nuami 'adi 'ivevita faifaina, we'e mogitana a kiluma bega 'wa na 'asetai a nuakalikaliemi bwaikina.

Faulo i veifufu tamu tosakona faifaina.

⁵ ✧ Nuanuaku a na veifufu tomogonina nuada i kiavenuavitadiga faifaina. Fai taunina tamu iami yau kebu 'aiseku yana sauluva faifaina a da nuavita, 'omi wata sai'afo 'wa nuavita. Siwe kebu nuanuaku yana bunumayaga a na 'ivebwaiki, begaidi kebu wata faifaina a na vona. ⁶ 'Akonadi sai'afo matatabumi vematavuloga 'wa veleni yami luvulewa 'wainega, siwe tutuya de'e 'asa'aiana. ⁷ Nuanuaku 'wa na nuatavuni nuana 'wa na 'ive'atumaia i na nunago yana nuavita i na vebwaika-'afo'afo i na 'ivedumwe'ai'aia. ⁸ Begaidi a na vonemi nuanuaku yami sauluva wata yami vona 'waidiega 'wa na ve bega i na 'asetai 'wa nuakalikaliemi. ⁹ Basenadi leta a kiluma i wai 'waimie 'ana vematavuloga faifaina, a silubumi a da 'asetai yaku vona 'wa vevematayakeyakedi nani matatabuna 'waidie 'alo kebu. ¹⁰ 'Ai'edi aitoi 'wa nuatavuniga, yau wata bani'odi 'akonadi a nuatavuni. We'e yaku nuatavunanina, 'ai'edi mogitana tamu sakona i 'eno'eno a nuatavuniga, a nuatavuni Keliso mataneye yami 'atumaina faifaina nika 'wa na sosoana. ¹¹ ✧ Fai Seitani yana nuanua sakoidi ta 'asetadi, tosakona 'akonadi i nuavilaiga ta na nuakalikaliemi, i na nunago Seitani i na vetoketoke 'waideye nika 'ida tovetumagana yada mia i na 'ivesakoi.

Yaubada yana tofolovavo i kiavetoketokedi.

¹² ✧ Basenadi yaku lauvivila 'waineye a nago 'atamana Tiloasi a na lau'age Keliso Valana 'Atumaina faifaina. Tutuyanina a le'wa a 'iseni 'akonadi 'Auvea tomotoganidi yadi nuanua i 'idewadi begaidi nuanuadi Valananina i na nogai. ¹³ We'e bei igodi iada Taito a da veluagai valami i da lu'ivona 'waikuye nika a 'isa'avai. Fai a 'isa'avai nuafouku i veviga begaidi a 'alanuai nika a tauya a nago 'awalawa Masidonia.

¹⁴ ✧ Bei Taito a veluagai valami i lu'ivona 'waikuye, 'ana nogaya 'atumaina begaidi a vekaiwa Yaubada 'waineye. A vekaiwaga Yaubada 'waineye fai i vetoketoke 'ana gaviavo 'waidie Keliso 'wainega, we'e 'ima yana tofolovavo tutuya matatabuna i 'e'edakumesema wata i kikiavetoketokema. Yaubada i venua'ivinema Keliso 'ana 'aseta faifaina 'a lalau'age tomotoga matatabuna 'waidie, 'wa da vo tamu magari 'ana yaoga 'iwanina i da susula tomotoga 'waidie. ¹⁵ ✧ Tomotoga 'ifwaidi i nunago 'ita'ita'i 'ana 'eda 'waineamo, we'e 'ifwaidi i nunago wafaotoga 'ana 'eda 'waineamo. Keliso faifaina 'a lalau'age tomotoganidi matadie, bani'odi Keliso magari i sousouyeni 'wainega, Yaubada yana 'eba sosoana. ¹⁶ Tomotoganidi i nunago wafaotoga 'ana 'eda 'waineamo Keliso 'ana lau'age 'waidie bani'odi taumata 'anibaina magari, we'e tomotoganidi 'ita'ita'i i veveluagai, 'ana lau'age 'waidie bani'odi magari 'iwanina, yadi 'eba 'isa 'awaie mia 'atumaina

wata miamia-vagaina i na veluagai. Folovanina vetolau'age, 'wa da nuani egavo 'adi fata i na folovi? ¹⁷ ☆Tomotoga fuedi Yaubada yana Vona i lalau'agega yadi nuanua i vo, Nani-'avo'avovo siwe 'a na lalau'age mani bwaikina 'a na veluagai.” We'e 'ima, kebu bani'odi 'a da vesauluvediga. Fai Yaubada i venua'ivinema 'a vetofolova Keliso faifaina, kebu faifaima 'a da nuanua, Yaubada mataneyeye yana Vona 'a veveifufu tonovina. Begaidi folovanina vetolau'age faifaina, 'ima 'ama fata.

3

Faulo Yaubada yana toketokena 'wainega i folo-folova.

¹ ☆'Ima 'a vo, 'Ama fata Yaubada yana folova 'a na 'idewai,” bega voke 'wa na vo, Faulo ma enavo taunidi i awa'ai'aidi basenadi bani'odi.” Tolau'age 'ifwaidi i waia 'waimie ma yadi lubulubu mali tomotoga i kilumidi 'adi 'aseta wata 'adi awave'atumai faifaina. Wata bani'odi 'omi me Kolinita tolau'age 'ifwaidi yadi lubulubu 'wa kilumidi 'adi 'aseta wata 'adi awave'atumai faifaina bega i na nagoi mali 'awalawa 'waidie i na lau'age. Voke wata 'wa na vo, Faulo ma enavo i lubwainedi ma yadi lubulubu 'adi 'aseta wata 'adi awave'atumai faifaina.” ² We'e 'ima, 'ama 'aseta wata 'ama awave'atumai 'ana lubulubu 'asa'aiana 'omi. 'A vebaema 'wa awave'atumaiema, 'wa da vo 'wa da kiluma yama nuanua 'waidie. Tomotoga matatabudi 'adi fata yami sauluva i na 'isedi i na 'asetai 'omi

Keliso yana tomotoga, yama folova vuagina 'omi, nika i na awave'atumaiema. ³ ✧Akonadi ma 'ana 'aseto tomotoga 'waidie 'omi Keliso yana leta. Yama lau'age 'wainega Keliso tauniotogina i kiluma yami nuanua 'waidie. Basenadiotoga Yaubada yana ve'etoboda i kilumidi kileu 'waidie i 'anivelenedi Mosese 'waineye. We'e Keliso kebu 'eba kilumaotoga 'wainega i da kiluma kileu 'alo lubulubu 'waineye, i kilumaga Yaubada Miamia-vagina 'Anu'anununa 'wainega tomotoga yami nuanua 'waidie.

⁴ De'e bani'odi yama folova vuagina 'a veifufuyeniga fai ma yama vetumagana taunima 'a tauyema Yaubada 'waineye wata 'a nuani mogitana Keliso toketokena i velevelema naninidi faifaidi. ⁵ Kebu tamu nani toketokena i da 'eno'eno 'waimeye bega 'a da vo, Yaubada yana folovanina, tauni'avama 'ama fata,” we'e mogitana Yaubada yama toketokena i velevelema bega 'ama fata yana folova 'a na 'i'idewai.

⁶ ✧Tauniotogina yana toketokena 'wainega 'a vetofolova faifaina yana Veakutagona 'Ivauna 'ana vona'awaufa 'ada 'ita'ita'i faifaina 'a veveifufuyeni. Yana Veakutagona 'Ivauna kebu bani'odi ve'etoboda kilukilumidi, we'e mogitana i mai Yaubada 'Anu'anununa 'wainega. Tomotoganidi ve'etoboda kilukilumidi i geudi, 'adi vematavuloga i wafaotoga, we'e Yaubada 'Anu'anununa 'wainega tomotoga mia 'atumaina wata miamia-vagina i veveluagai.

Veakutagona 'Ivauna 'ai'aiwabu magemageta.

✧ 3:3: Sou 24:12 ✧ 3:6: Ion 6:63; Lom 7:6

7 ✨Yaubada yana ve'etoboda i kilumidi kileu 'waidie i 'anivelenedi Mosese 'waineye. Tutuyanina 'waineye yana mageta mataududulina i souyeni nika Mosese maigina i magetai. Magetanina 'akonadi i vevesiai siwe me Diu kebu 'adi fata Mosese maigina i na 'isadewai fai matadi i 'ani'anidi. Yaubada yana ve'etoboda, 'asa'aiana yana Veakutagona Nagami, i souyeni yana mageta mataududulina taiadi, siwe tomotoganidi i geudi wafa i veluagai. 8 We'e Yaubada yana Veakutagona 'Ivauna i souyeniga 'Anu'anunu 'Atumaina 'wainega, vona mogitana 'ai'aiwabu wata mageta mataududulina bwaikaotogina i sousouyedi 'wainega. 9 ✨Ve'etobodanidi 'adi togeu Yaubada i veimea 'adi vematavuloga wafa, siwe tutuyanina ve'etobodanidi i souyedi, Yaubada yana mageta mataududulina taiadi. We'e Yaubada yana Veakutagona 'Ivauna 'wainega i 'ive'atumaida yada sauluva matatabuna i tonova, vona mogitana Veakutagonanina toketokeotogina wata yana 'ai'aiwabu bwaikaotogina. 10 Fai tutuya de'e Yaubada yana Veakutagona 'ada 'ita'ita'i faifaina nani bwaikaotogina, ve'etobodanidi i maiga Mosese 'wainega mageta taiadi bani'odi i venani-'avo'avovo. 11 Ve'etoboda i mai mageta taiadi siwe 'a'a'avidi, we'e Veakutagona 'Ivauna, kumanina i na 'eno-vagata, vona mogitana naninina toketokeotogina wata yana 'ai'aiwabu bwaikaotogina.

12 Fai 'a nuani mogitana Yaubada yana

✨ 3:7: Sou 34:30; Gal 3:2-5 ✨ 3:9: Lom 3:21

Veakutagona 'Ivauna 'ada 'ita'ita'i faifaina i na 'eno-vagata, 'ima yana tofolovavo yama lau'age 'waidie kebu 'a da ve'awamayamayaga, ma yama venuafoufa'ala 'a veveifufu'a'aveni. ¹³ 'Ima kebu bani'odi Mosese. Kebu tamu vona 'a da giveni Veakutagona 'Ivauna faifaina. We'e Mosese, Yaubada yana mageta mataududulina maigineye i giveni. Maigina i baniumai kalekoyega bega me Isileli kebu 'adi fata magetanina i vevesiaiga i na 'iseni. ¹⁴ ✧Kebu Mosese 'aisena maigina babaniumanaga, wata me Isileli-nidi nuadi tabodadi. Tutuyanina 'wainega i maiga 'asiau Veakutagona Nagami 'ana lu'iaawawa me Isileli kebu nuadi i da magemagetadi 'wa da vo baniumanina 'wainega nuadi i da baniumadi. Kebu tamu aitoi 'ana fata baniumanina i na si'a'ia i na taweni, 'aiseotogina Keliso 'ana fata. 'Ai'edi i na vetumagana Keliso 'waineye bega taiadi i na miave'itubama, baniumanina i na si'a'ia nika nuadi i na magetadi. ¹⁵ Kebu basenadi 'aisena, 'asiau wata, ve'etoboda i maiga Mosese 'wainega i na lu'iaawawadi siwe nuadi kebu i da magemagetadi fai nuadi babaniumadi. ¹⁶ ✧We'e 'ai'edi aitoi yana sakona 'wainega i na nuavilai 'Auvea 'waineye nuana 'ana baniuma i na si'a'ia. ¹⁷ ✧'Auveanina siwe 'asa'aiana 'Anu'anunu 'Atumaina. Aitoi i na agei 'waineye i na miamiaga, taunina yavuyavuna nani matatabuna i veimeyeniga 'waidiega. ¹⁸ 'Ida tovetumaganavo matatabuda Keliso nuada i kiavemagetadi 'wa da vo nuada 'adi baniuma i da si'a'idi

✧ **3:14:** Lom 11:25 ✧ **3:16:** Lom 11:23,26 ✧ **3:17:** Ion 8:32,36; Lom 8:2; Gal 5:1

nika 'ida nigo'ita bani'odi. Tomotoga 'adi 'isa'isa 'adi fata nigo'ita 'waineye i na 'iseni, wata bani'odi tomotoga 'adi fata 'Auvea yana 'ai'aiwabu magemagetana wata yana 'atumaina i na 'isedi 'waideye. 'Auveanina, taunina 'Anu'anunu 'Atumaina i 'i'idewada bega yana 'ai'aiwabu magemagetana wata yana 'atumaina i vevebwaika 'waideye wata ta vevetuli i na nagoga bega 'ida taunina bani'odi.

4

Yaubada 'ana 'asetai 'waideye bani'odi 'ai'aiwabu.

¹Yaubada ma yana nuakalikali i venua'ivinema 'a vetolau'age Iesu Valana 'Atumaina faifaina, begaidi tutuyanina vita tulina tulina 'a veluagadi kebu 'a da baila. ² ✧We'e mogitana sauluva givagivadi wata 'eba bunumayaga 'a bailedi. Kebu tomotoga 'a da vekaliedi 'asetai-vekavekali 'waidiega wata Yaubada yana Vona kebu 'a da 'ivesakoi bega ve tulina 'wainega tomotoga nuadi 'a da 'ani'anidi. Mogitana Yaubada mataneye yana nuanua tonovidi 'a kikiavemagetadi tomotoga 'waidie bega 'adi vebae 'waidie i lutonovi yama ve vona mogitana. ³ Iesu Valana 'Atumaina 'a lulu'ageyeniga mogitana givagivana tomotoga 'ifwaidi 'waidie, tomotoganidi wafaotoga 'ana 'eda 'waineamo i nunagoi, 'aisedi kebu 'adi fata i na 'asetai. ⁴ ✧Seitani, kumanina fwayafwaya 'ana yaubada sakoina, nuadi i 'ivetabodadi bega kebu i da vetumagana wata

✧ 4:2: 1 Tes 2:5 ✧ 4:4: Efe 2:2

Vala 'Atumaina yana mageta kebu 'adi fata i na 'isa'inaanai. Valanina, Keliso yana 'ai'aiwabu wata yana mageta mataududulina i sivemagesedi, We'e Kelisonina taunina mogitana Yaubada bani'odi. ⁵ 'Wa 'iseni, 'ima kebu taunima 'ama subia faifaina 'a da lalau'age, we'e mogitana Iesu Keliso faifaina 'a lalau'age 'a vo, Taunina 'ada Toveimea, we'e 'ima 'a vetofolovaga 'waimie taunina faifaina.” ⁶ ✧A vetofolovaga wata 'a lalau'agega fai Yaubada nuama i kiavemagetadi. Basenadiotoga dudubala'ava, bega Yaubada i vo, Mageta i na souyeni dudubala 'wainega,” nika mogitana i magetai. Wata bani'odi Yaubadanina nuama i kiavemagetadi yana mageta 'wainega bega yana 'ai'aiwabu magemagetana 'a 'iseni Iesu Keliso maigina 'waineye. Yaubada yana 'ai'aiwabunina 'ana 'aseta 'waimeye bani'odi mageta.

⁷ Wata yana 'ai'aiwabunina mataududulina 'ana 'aseta 'waimeye 'asa'aiana 'ama 'uyua. 'Ima mweama tomogoma bani'odi nau siwe 'ai'aiwabunina i dodogidi 'waimeye bega mali tomotoga i na 'isema i na 'asetai yama toketokena 'a veluagai Yaubada 'wainega kebu taunima 'waimega. Toketokenanina bwaikaotogina, kebu 'ifwaidi bani'odiga. ⁸ Vita tulina tulina 'a veveluagadi siwe kebu 'a da 'awakuakualima, vitanidi faifaiddi 'a vekoi siwe kebu yama vetumagana i da mwea. ⁹ Keliso 'ana gaviavo i nikenikema siwe kebu Yaubada i da bailemaga, 'eba ilagi bwaikidi 'a veveluagadi siwe kebu 'a da wafa. ¹⁰ Basenadi Iesu 'ana gaviavo 'waidiega vita

✧ 4:6: Nag 1:3; 1 Fit 2:9

wata veviga i veveluagadi, mulieta i luvewafai. 'Ima wata bani'odi vita 'a veveluagadi Iesu Valana faifaina, igodi nuanuadi tomogoma i da luvewafadi siwe vitanidi 'waidiega tomotoga fuei i 'asetai Iesu mia 'ivauna wata 'atumaina 'adi to'anivelena. ¹¹ ✧Yama mia matatabuna 'waidie 'eba wafa 'a veveluagadi Iesu faifaina. Igodi bei 'a da wafawafa siwe ma yawaima bega tomotoga 'ifwaidi tomogoma 'a'a'avidu i na 'isedi i na 'asetai Iesu miamia-vagaina tomogomeye i miamia. ¹² 'Ana 'asetai side bani'odi. Fai 'a lalau'age Iesu Keliso faifaina 'ana gaviavo vita i vevelema igodi nuanuadi i da luvewafama, we'e 'omi yama lau'age 'waidiega Keliso Valana 'wa nogai, mia 'atumaina wata miamia-vagaina 'wa veveluagai.

¹³ Tamu vona i 'eno'eno Yaubada yana Buki nageneye i vo,

A vetumagana Yaubada 'waineye, begaidi a voneyeni.”

'Ima wata bani'odi 'a vetumagana begaidi yana vona 'a veveifufuyeni. ¹⁴ ✧Yaubada, kumaina 'ada Toveimea Iesu i sivetovoia wafayega, 'a 'asetai wata i na sivetovoima Iesu taiadi. Wata bani'odi 'omi i na sivetovoimi, 'omi wata 'ima taiadi i na vagavaida ta na nagoi mataneyeye. ¹⁵ 'Ama vitanidi matatabuna 'a veluagadi fai Iesu Valana 'Atumaina 'a lalau'age, siwe fai 'wa vetumagana Valanina 'waineye 'aivaita 'wa veluagai. Valanina i nunago tomotoga fuei 'waidie Yaubada yana nuakalikali i veveluagai nika tovetumagana 'ada

✧ 4:11: Lom 8:36 ✧ 4:14: Lom 8:11; 1 Tes 4:14

'aila'a i vevefue. I vevefuega nika yada vekaiwa Yaubada 'ana subia i toke i vevebwaika-'afo'afo.

'Ai'aiwabunidi 'awaie ta na veluagadiga vita i vebwaika-'iawedi.

¹⁶ Fai 'awaie Yaubada i na sivetovoida Iesu taiadi, bega kebu 'a da vo, 'A baila.” Tomogoma yadi toketokena i mweamwea i na nagoga nika i na 'a'ava, we'e 'aiata 'aitamogana 'aitamogana 'anu'anunuma i 'i'ive'ivaudi. ¹⁷ ✧Vitanidi 'a veveluagadi nani siaina 'awaie i na 'a'ava, siwe 'waidiega 'ai'aiwabu magemagetana wata miamia-vagaina 'a na veluagadi, 'ai'aiwabunidi bwaikaotogidi, kebu bani'odi 'ama vita. ¹⁸ ✧Begaidi naninidi 'a veveluagadi fwayefwayeye 'a 'isamata'aliliedi, we'e naninidi kebu ta da 'ise'isediga faifaidi 'a nuanua. Naninidi ta 'ise'isediga 'a'a'avidi 'awaie i na 'a'ava, we'e naninidi kebu ta da 'ise'isediga i na 'eno-vagata.

5

Faulo nuanuana tomogona 'ivauna abamega i na veagei.

¹ ✧Vitanidi 'a veveluagadi kebu faifaidi 'a da nuanua fai 'a 'asetai fwayefwayeye tomogoda bani'odi vadavada, 'awaie wafa 'ana tutuye i na 'awageudi. Mogitana ta na wafa tomogoda ta na bailedi, siwe tomogoda 'ivaudi wata miamia-vagaidi i 'eno'enovi abame, tomogodanidi kebu tomotogaotoga 'adi 'idewadewa, Yaubada taunina i 'idewadi. ² ✧Tutuya de'e tomogodanidi 'waidiega ta 'abiawa

✧ 4:17: Lom 8:17-18 ✧ 4:18: Ibu 11:1-3 ✧ 5:1: 1 Kol 15:47-49

✧ 5:2: Lom 8:23

ta veve'awagusi, nuanuada bwaikina tomogoda abamega i na veageda. ³ Tomogoda 'ivaudi i na veagedaga 'ida kebu 'anu'anunu'avaga, ma tomogoda. ⁴ ✧Fwayefwayeye ta miamia tomogodanidi de'e 'waidie vita ta veveluagadi ta veve'awagusi 'wa da vo venuana vitadi ta da evaevadi. Ta veve'awagusiga, kebu ta da vo, Tomogodanidi ta na bailedi," we'e mogitana nuanuada ma yawaida tomogoda abamega i na veageda bega mia 'ivauna wata miamia-vagaina tomogoda 'a'a'avidu i na talafwasedi. ⁵ ✧Ta na vetuliga faifaina Yaubada tauniotogina i 'idewada, 'Anu'anununa i tauyeni i ageda yada 'eba 'isa 'awaie 'ada veuveuta tomogoda 'ivaudi taiadi ta na veluagadi.

⁶ ✧Fai 'Anu'anunu 'Atumaina i ageda, 'ima Yaubada yana tofolovavo kebu 'a da kolologa, tutuya matatabuna 'a vevenuafoufa'ala. 'A'asetai fwayafwaya de'e 'waineye tomogomanidi 'waidie 'a vevevanuga, 'ani'idina 'Auvea 'wainega 'a miamia. ⁷ Naninidi 'awaie 'a na veluagadiga kebu 'a da 'ise'isedi, siwe yama mia matatabuna 'waidie 'a vetumagana Yaubada 'waineye. ⁸ ✧Mogitana 'a venuafoufa'ala, kebu wafa faifaina 'a da kololo. Nuanuama bwaikina tomogoma 'a na bailedi, 'a na vevanuga 'Auvea 'waineye. ⁹ Siwe yama nuanua bwaikaotogina nani 'aitamogana faifaina. Naninina nuanuama 'Auvea i na sosoana faifaima, we'e 'ai'edi 'a na vevevanuga tomogomeye 'alo 'a na 'iawedi 'a na nago 'waineye taiadi 'a na miamia, kebu tamu ava'ai.

✧ 5:4: 1 Kol 15:53 ✧ 5:5: Lom 8:16,23 ✧ 5:6: Ibu 11:13-14

✧ 5:8: Fil 1:23

10 ✧ Nuanuama Yaubada faifaima i na sosoana fai i lubwaineda 'awaie matatabuda ta na tovoi Keliso mataneye ta na vonayavuga. I na veimea 'aitamogana 'aitamogana 'ada tutula ta na 'ewa yada sauluva fwayefwayeye faifaidi, 'adi 'isa'isa bani'odi, 'atumaidi 'alo sakoidi.

Keliso yana wafa 'wainega ta veiana Yaubada taiadi.

11 Fai 'awaie tutula ta na veluagai Keliso 'wainega ma yama ve'ililibu 'Auea 'a kololoyeni, begaidi yana vona 'a veveifufuyeni tomotoga 'waidie, nuanuama bwaikina ma yadi vetumagana taunidi i na tauyedi 'waineye. Yaubada yama sauluva matatabuna i 'asetadi, nuanuaku 'ami vebae 'waidie 'omi wata 'wa na lutionovi yama nuanua tonovidi. 12 Voke 'ifwaimi 'wa na vo, Faulo ma enavo 'adi subia faifaina taunidi i awa'ai'aidi basenadi bani'odi.” Siwe kebu. Nuanuama 'a na tolinuata'i 'waimie yama sauluva faifaidi bega 'ami fata 'wa na subiamama mali tomotoga 'waidie. Tomotoga 'ifwaidi 'waimie 'adi 'isa faifaidi taunidi i awa'ai'aidi, siwe yadi sauluva kebu i da nuanidi. Tutuyanina taunidi i na awa'ai'aidi 'ami fata yama sauluva tonovidi 'wa na lu'ivona toawa'ai'ainidi 'waidie. 13 'Ai'edi 'ifwaimi 'wa na vo, Faulo ma iana nuadi 'anigaugaudi,” bani'odi 'wa na vonevoneyediga 'asa'aiana siwe fai Yaubada nuama i 'ewadi 'a toke 'a folofolova faifaina. 'Ai'edi 'wa na vo, Faulo ma iana nuadi magemagetadi,” bani'odi 'wa na voneyediga 'wa vona mogitana fai ma yama 'aseta 'a ve 'waimie, 'aivaita 'wa veluagai. 14 Keliso yana nuakalikali faifaيدا i lulukakadema

yama sauluva matatabuna i veveimeyedi. I veveimeyema fai 'a 'asetai Keliso 'aiseotogina i wafa tomotoga matatabuda faifaida, begaidi matatabuda ta wafa taiadi. ¹⁵ ✧ I wafaga matatabuda faifaida bega egavo ma yawaidi i miamianiga, kebu taunidi yadi nuanua i na 'i'idewadi, we'e mogitana Keliso 'aisena yana nuanua nuadi i na 'ewai, Kelisonina kumanina faifaiddi i wafa wata i tovoi-vaitugana.

¹⁶ Basenadi tomotoga 'adi 'isa 'waidiega 'a awavesakoyedi 'alo 'a awave'atumaiedi, we'e tutuya de'e kebu wata bani'odi 'a na voneyediga. Wata bani'odi basenadi Keliso 'ana 'isa 'wainega 'a vo, Taunina tomogo-'avo'avovo," tutuya de'e 'a 'isa'innanai taunina 'ada Toveimea. ¹⁷ ✧ 'Ai'edi aitoi Keliso taiadi i na miave'itubama, 'akonadi Yaubada i 'ive'ivauya, yana nuanua nagami sakoidi i 'a'ava, ma'itufa yana mia 'ivauna nuanua 'ivaudi taiadi i souyedi. ¹⁸ ✧ Ve'ivaunina nuanua 'ivaudi taiadi Yaubada i 'idewadi. Basenadi 'ida Yaubada 'ana gaviavo, siwe Keliso yana wafa 'wainega i veianeda, wata folova i velema bega tomotoga 'a vonevonedidi bani'odi i na munega bega wata i na veiana Yaubada taiadi. ¹⁹ ✧ 'A vonavonaga side bani'odi 'a vo, Yaubada Keliso i voneni i mai fwayefwayeye yana wafa 'wainega yada sakona i tovoiedi begaidi i veianeda. Vematavuloga kebu i da veleda yada sakonanidi faifaiddi i veve'ise'isedamo wata i nuatavunida. Vala, veiana faifaina Yaubada i tauyema 'a lalau'age tomotoga 'waidie.

✧ 5:15: Lom 14:7-8 ✧ 5:17: Ion 3:3 ✧ 5:18: Lom 5:10

✧ 5:19: Kolos 1:19-20

20 Begaidi 'ima Keliso tutulina 'a lulu'ivona faifaina 'wa da vo Yaubada tauniotogina i da toke i da vonavona 'waimega. Keliso 'ana wagavayega 'a vevelu'ui 'waimie, nuanuama taunimi 'wa na tauyemi Yaubada 'waineye i na veianemi. 21 ✧Keliso kebu tamu yana sakonaga siwe Yaubada yada sakona matatabuna i 'ewadi Keliso i ve'ewai bega Yaubada yana nuasako wata 'ada vematavuloga i tovoiedi. Yada sakonanidi i tovoiedi bega 'ida ta miave'itubama taunina taiadi Yaubada yana 'atumaina i 'aniveleneni 'waideye nika ta ve'atumai mataneyeye.

6

1 'Ima Yaubada yana tofolovavo taunina taiadi 'a folofolova begaidi wata 'a na vonemi. Yaubada yana nuakalikali 'wa veluagaiga, kebu 'wa na venani-'avo'avovoyeniga. 2 ✧Fai Yaubada yana Vona i 'eno'eno yana Buki nageneye i vo,

Tutuyanina a vo, Nuanuaku 'wa na mai 'waikuye," bonami a nogaidi.

'Aiatanina 'waineye a vo, A na 'ita'ita'iemi," bei a 'ivaisemi."

We'e yau Faulo a na vonemi, tutuya de'e Yaubada nuanuana 'wa na nagoi 'waineye, 'asiau nuanuana i na 'ita'ita'iemi.

Faulo vita fuedi i veluagadi.

3 Yama sauluva matatabuna 'a 'i'isave'avinidi, i na nunago tamu aitoi yama sauluva i na 'iseni i na vo, Faulo igodina Yaubada yana tofolova siwe i sakosakona, begaidi Kelisonina

✧ 5:21: Ibu 4:15, 7:25-26 ✧ 6:2: Luk 4:19-21; Ais 49:8

i vonevoneyeniga a baila.” 'Ai'edi bani'odi tomotoga 'a na kiavebe'udiga, mali tomotoga yama folova i na awavesakoyeni. ⁴ We'e mogitana nani matatabuna 'waidie 'a veve 'ima Yaubada yana tofolovavo. Naninidi side. Vita tulina tulina 'a veveluagadi 'eba nuavita taiadi siwe 'a tokemaigema. ⁵ Tomotoga i nikenikema, i yatoyatoma vanuga 'eba yogona 'waidie, wata 'ama daba i dabadaba. Fai 'ima Yaubada yana tofolovavo 'a toke 'a folofolova kebu 'a da veveawai, lovane kebu 'a da 'enodewadewa wata tutuya fue di ma 'ama lase. ⁶ ✧ Wata yama sauluva tonovidi 'waidiega, yama 'aseta 'waidiega, yama tokemaiga mali tomotoga faifaidi 'waidiega, wata yama 'anivelena 'waidiega 'a veve 'ima yana tofolovavo. Wata fai 'Anu'anunu 'Atumaina i agema wata ma yama nuakalikali taunima 'a tauyema tomotoga 'waidie. ⁷ Yama vona 'adi nogaya tonovidi 'waidiega 'a veve 'ima Yaubada yana tofolovavo wata fai yana toketokena i 'i'ivaisema nani matatabuna 'waidie. Tolugavia 'adi 'atagiega yadi 'ibadi, we'e 'adi wamayega yadi babala. 'Ima wata bani'odi, Yaubada yana nuanua tonovidi 'asa'aiana yama 'eba vetalaga wata yama 'eba vetoketoke. ⁸ Tomotoga 'ifwaidi i ve'ililibuyema, we'e 'ifwaidi i awadamana 'waimeye. 'Ifwaidi i subiamana, 'ifwaidi i yagaima. Yama vona matatabuna tonovidi, siwe 'ifwaidi i vo, I vevekali.” ⁹ ✧ Tomotoga 'ifwaidi yadi nuanua 'ima tomotoga-'avo'avovo, we'e Yaubada wata yana tomotoga taiadi, 'waidie ma 'ama 'aseta. I nikenikemaga 'ifwaidi i vo, I na wafa,” siwe kebu,

✧ 6:6: 1 Tim 4:12 ✧ 6:9: 2 Kol 4:10

ma yawaima 'a miamia. 'Eba ilagi 'a veveluagadi siwe kebu 'a da wafawafa. ¹⁰ ✧Ma yama nuavita 'a miamia siwe tutuya matatabuna Yaubada i kikiavesosoanima. 'Ama 'isa 'waidiega 'ima 'a vewekowekoma, siwe yama lau'age 'waidiega tomotoga fue di i ve'ai'aiwabu Yaubada yana nuanua 'waidiega. 'Ana 'isa 'ima kebu tamu ava'ai 'waimeye i da 'eno'eno, we'e mogitana nani fue di Yaubada yana 'anivelena 'waimeye i 'eno'enovi.

¹¹ Emavo, 'omi me Kolinita, kebu tamu nani 'a da giveni 'waimiega, nani matatabuna 'a veifufu'a'avedi, wata 'a nuakalikaliemi bwaikina. ¹² Yama nuakalikali 'waimie kebu givagivana, we'e 'omi yami nuakalikali 'waimeye 'a luluawayogeni. ¹³ A vonevonemi 'omi 'wa da vo natukwawo mogitana, nuanuama ma yami nuakalikali taunimi 'wa na tauyemi 'waimeye, 'ima 'a nuakalikaliemiga bani'odi.

Tovetumagana wata taunidi kebu i da vetumagana kebu taiadi 'wa na miave'itubama.

¹⁴ ✧Tomogo manamanawena wata kwamana siaina kebu 'adi fata venuana i na 'ifafuli, wata bani'odi tovetumagana wata taunidi kebu i da vetumaganaga kebu 'adi fata taiadi i na miave'itubama. 'Wa da nuani? 'Ana fata nuanua tonovidi wata sakona taiadi i na veiana? Bani'odi mageta nuanuana dudubala? Kebu'a'ava, kebu tamu sai'afo bani'odi. ¹⁵ 'Wa da nuani, Keliso Seitani yana nuanua 'ana fata i na awave'atumaieni? Tovetumagana wata taunidi kebu i da vetumaganaga, 'adi fata taiadi i na ve'au? 'A nuani yadi

✧ 6:10: Kolos 1:24 ✧ 6:14: Efe 5:7-11

nuanua kebu i da vesala. ¹⁶ ✧ 'Ana fata tomotoga i na 'odu'odu tamu nani 'waineyeye Yaubada yana vanuga 'eba velu'ui nageneyeye? Kebu'a'ava, fai 'ida Yaubada Miamia-vagaina yana 'eba mia, begaidi side bani'odi Yaubada i voneyedi yana Buki nageneyeye i vo,

Tomotoganidi 'waidie a na vevanuga, taiadi 'a na miamia. Yau yadi Yaubada, we'e taunidi yaku tomotoga.”

¹⁷ ✧ Fai 'Auvea i vevanuga 'waideye begaidi wata i vo,

Tosakona 'wa na bailedi, 'wa na 'awa'idimi 'waidiega.

Naninidi a talabodediga kebu 'wa na 'abitonovidi, nika a na vagavaimi 'wa na maia 'waikuye.

¹⁸ ✧ Yau tamami, we'e 'omi natukwavo iavetami wata vevinemi.

Yau 'Auvea Toketokeotogiku yaku vona side bani'odi.”

7

¹ ✧ Ekwavo, vona'awaufaufanidi ta veluagadi Yaubada 'wainega begaidi i lubwaineda naninidi tomogoda wata 'anu'anunuda i 'ivesakodi ta na bailedi. Ta ve'ililibuga Yaubada 'waineyeye begaidi ta na vewavawava yada sauluva i na ve'atumaiotoga, kebu tamu sakona i na 'eno'eno.

Faulo yana sosoana.

² Nuanuama ma yami nuakalikali taunimi 'wa na tauyemi 'waimeye. Kebu tamu aitoi 'waineyeye

✧ 6:16: 1 Kol3:16 ✧ 6:17: Ais52:11 ✧ 6:18: Ose 1:10 ✧ 7:1: 1 Ion 3:3

'a da vesauluva sakoina, kebu tamu aitoi 'a da vekalieni i da sakona, kebu tamu aitoi yana kukua 'a da eloi vekaliega. ³ Mogitana tomotoga 'ifwaidi bani'odi i awavesakoyeku siwe kebu nuanuaku a na vevitami 'wa vonaga bani'odi. Basenadi a vonemi wata a na luvaitugani, yama nuakalikali 'waimie bwaikina. 'Ai'edi taiadi ta na miamia 'alo ta na wafa kebu tamu ava'ai, siwe tutuya matatabuna 'a nuanuanimi. ⁴ Ma yaku vetumagana a nuani mogitana 'wa na tovoi fa'alina, ma yaku sosoana a awa'ai'aimi mali tomotoga 'waidie. Fai valami 'ana nogaya 'atumaina 'waikuye 'ama vita 'waidie 'wa kiavesosoaniku, yaku sosoananina kebu ta na vona.

⁵ Tutuyanina 'a le'wa 'awalawa Masidonia, bei wata vita 'a veluagadi. Kebu tamu tutuya 'a da veawai vitanidi 'waidiega i veluboda'a'avema. 'Ama tovedumwe'ai'ai nuanuadi taiadi 'a na ve'ikwayekwayega we'e 'ima 'a ven-uafouviga 'omi tovetumaganavo faifaimi i na nunago Keliso 'wa na baileni. ⁶ ✧ We'e Yaubada, taunina tonuavita nuadi 'adi to'ive'atumi bega i kiavesosoanema Taito 'wainega, tutuyanina i le'wa 'a 'iseni 'a sosoana. ⁷ Kebu yana mai 'aisena faifaina 'a da sosoana, siwe wata 'a sosoana fai 'omi Taito 'wa kiavesosoani. I lu'ivona 'waimeye 'wa nuakalikalieku faifaina, ma yami nuavita 'wa nuavilami yami sakona 'waidiega, wata nuanuami ma yami dumwebika yaku nuanua 'wa na 'i'idewadi. Begaidi a sosoana-'afo'afo faifaimi.

⁸ Mogitana 'wa nuavita letanina basenadi a ki-

✧ 7:6: 2 Kol 1:3-4

lumi 'waimie faifaina, siwe kebu yaku nuanua a na sivilai a na vo, Awale bani'odi a kilumedi?" Nagami a nuavita letanina faifaina fai a 'asetai yaku vonanidi toketokedi 'waidiega 'wa nuavita, siwe kebu bei 'wa da nunuavitaga, 'akonadi i 'a'ava. ⁹ We'e yau, tutuya de'e a sosoana, siwe kebu a kiavenuavitamiga faifaina, a sosoana fai yami nuavitanina 'wainega 'wa nuavilami nika yami sauluva 'wa siviladi. 'Wa nuavitaga Yaubada nuanuana 'ami 'aivaita faifaina, bega vita kebu 'wa da veluagai yaku vonanidi a kilumidiga 'waidiega. ¹⁰ ☆'Wa nuavitaga nani 'atumaina, fai nuavitanina Yaubada nuanuana, 'wainega nuavilana i souyeni i na nagoga 'ita'ita'i 'wa na veluagai. Nuavilananina faifaina kebu nuanuada nuada ta na siviladi. We'e tomotoganidi fwayafwaya 'ana nuanua nuadi i 'ewadiga, i na nuavitaga kebu i na nuaviladi i na nagoga nika i na wafaotoga. ¹¹ Yami nuavitanina 'wainega, ava'ai Yaubada i 'idewaiga 'akonadi 'wa 'iseni. 'Wa dumwebika faifaina, nuanuami bwaikina mali tomotoga i na 'isemi yami sauluva 'akonadi i tonova. Sakonanina 'waimie faifaina 'wa bunumayaga bwaikina, wata nuafoumi i veviga vematavuloga faifaina. Wata yami nuavitanina 'wainega yami nuakalikali faifaiku i souyeni, we'e ma yami toke-maiga tosakona tamu 'waimiega vematavuloga 'wa veleni. Yami sauluvanidi i ve, 'akonadi nani matatabuna 'wa kiavetonovidi, kebu tamu aitoi 'ana fata i na vevitami. ¹² Letanina basenadi a kiluma i waiga, tosakona wata tomotoganina vita i veluagai tosakonanina 'wainega, kebu 'aisedi

☆ **7:10:** Mad 27:3-5; Ibu 12:16-17

faifaidi. Siwe wata a kilumaga, yaku nuanua bwaikina nuanuaku a na 'ivaisemi nika Yaubada mataneye 'wa na 'asetai 'wa nuakalikaliema. ¹³ Naninidi 'waidiega nuama i ve'atumai wata 'a sosoana.

Mogitana 'a sosoana yami sauluvanidi faifaidi, siwe wata 'a sosoana bwaikina fai Taito 'wa kiavesosoani yami sauluva 'atumaiddi 'waidiega.

¹⁴ Basenadi Taito 'waineye a awa'ai'aimi. A awa'ai'aimiga i lubwaineni fai tutuyanina Taito i wai yami sauluva 'atumaiddi i 'isedi, faifaidi i sosoana, we'e yau kebu a da bunumayaga a subiamiga faifaina. Yama vona matatabuna 'waimie vona mogitana, wata bani'odi yaku subianina faifaimi 'ana mogitana i souyeni. ¹⁵ Matatabumi ma yami kololo wata ma yami ve'ililibu Taito taiadi 'wa veluaga wata taunimi 'wa tauyemi yana nuanua 'wa vematayakeyakedi, begaidi tutuya de'e yami sauluvanidi i nuanuanidi nika yana nuakalikali faifaimi i vevebwaika. ¹⁶ Wata fai a nuani mogitana bola 'wa vevematayakayaka a sosoana bwaikina.

8

Faulo i veifufu 'anivelena-maimaiga faifaina.

¹✧Emavo, nuanuama 'wa na 'asetai Yaubada ma yana nuakalikali i vesauluva 'atumaina tovetu-maganavo 'adi 'aila'a tulina tulina 'waidie, Masidonia nageneye. Yana nuakalikalinina 'wainega me Masidonia i 'a'aivaita. ² Tomotoganidi vita fuedi i veluagadi 'adi sailubu, siwe i sosoanamo. Avinodi i vewekowekoma mogitana siwe yadi

✧ **8:1:** Lom 15:26

'anivelena-maimaiga bwaikaotogina. ³⁻⁴ ☆Yau a 'asetadi bega a na lu'ivona 'waimie, ava'ai 'waidie 'ana fata bani'odi i yato, siwe wata nuanuadi i 'imoso'i nika taunidi faifaidi i 'usa. Taunidi yadi nuanuayega i velu'uiema, nuanuadi bwaikina 'a na tauyedi mali tovetumaganavo taiadi, Yaubada yana tomotoga i vewekowekomaga i na 'ivaisedi. ⁵ 'Ima nagami 'a nuani 'a vo, Me Masidonia i na 'anivelena-maimaiga,” siwe kebu nimadiega 'aisena. Nagami Yaubada yana nuana bani'odi taunidi i tauyedi 'ada Toveimea Iesu 'waineye wata 'ima 'waimeye. ⁶ Me Masidonia yadi sauluva 'a 'iseni begaidi Taito 'a voneni 'a vo, Basenadi 'u veifufu me Kolinita 'waidie 'anivelena-maimaiga faifaina i velamu i yatoyato. Nuanuama wata 'u na nago 'waidie 'u na 'ivaisedi i na ve'a'avai nika ta na 'isedi ta na 'asetai ma yadi nuakalikali.” De'e bani'odi Taito 'a vonenina i wai. ⁷ ☆'Omi 'wa kumeta nani fueidi wata 'atumaidi 'waidie. Yami vetumagana fa'alina, yami vona 'adi nogaya 'eba nua'ewa, yami 'asetai bwaikidi, ma yami dumwebika 'wa 'a'aivaita, wata 'wa nuakalikaliema mogitana. Nuanuama wata 'wa na kumeta ma yami nuakalikali 'wa na 'anivelena-maimaiga.

⁸ De'e kebu a da veveimeyemiga. Me Masidonia yadi dumwebika a veifufuyedi 'waimie, bega yami 'anivelena-maimaiga 'a na 'iseni 'a na 'asetai 'wa nuakalikali mogitana tomotoganidi bani'odi 'alo kebu. ⁹ ☆'Akonadi 'wa 'asetai 'ada Toveimea Iesu Keliso yana nuakalikali. Taunina nagami 'ai'aiwabuna siwe 'omi faifaimi

☆ **8:3-4:** 1 Kol 16:2 ☆ **8:7:** 2 Kol 9:8 ☆ **8:9:** Mad 8:20; Fil 2:6-7

i vewekowekoma bega yana vewekowekoma 'wainega i 'ive'ai'aiwabumi Yaubada faifaina. 'Omi wata bani'odi taunimi 'wa na tauyemi 'wa na 'anivelena.

¹⁰ Yami 'anivelena-maimaiga faifaina, yaku nuanua a na veifufuyeni 'waimie. Ava'ai 'wa velamuyaga malamala i 'a'ava 'waineye, 'ai'edi tutuya de'e 'wa na ve'a'avaiga, 'atumaina. 'Omi 'aila'aniami 'wa kumeta 'wa yato, we'e mali tovetumaganavo i vemuli. 'Wa kumetaga kebu yato 'aisena faifaina, siwe wata 'wa kumeta 'anivelena-maimaiga 'ana nuanua 'wa 'idewai, 'ifwaidi i vemuli. ¹¹ Begaidi, tutuya de'e nuanuama folovanina 'wa 'i'idewaiga 'wa na ve'a'avai. Folovanina 'wa venua'ivineni ma yami dumwebika 'wa velamuyaga, wata ma yami dumwebika 'wa na ve'a'avai. Ava'ai 'waimie i 'eno'enoviga 'waidiega 'wa na ve'a'avai. ¹² ✧ 'Ai'edi nuanuami ma yami dumwebika ava'ai 'waimie i 'eno'enoviga 'waidiega 'wa na 'anivelena, yami nuakalikalini Yaubada yana 'eba sosoana. We'e Yaubada kebu i da vo, Naninidi kebu 'waimie i da 'eno'enoviga, 'waidiega 'wa na 'anivelena-maimaiga.”

¹³⁻¹⁴ ✧ Kebu nuanuama mali tomotoga ve'ai'aiwabu i na veluagai 'waimiega we'e 'omi ma'itufa 'wa na vewekowekoma. We'e mogitana fai tutuya de'e sai'afo moso'ina 'waimie, nuanuaku 'wa na yato tomotoganidi i 'usaga faifaiddi, mulieta 'ai'edi 'omi 'wa na 'usaga we'e taunidi 'waidie moso'ina i na 'ivaisemi. Bani'odi 'wa na vesauluvediga yami mia i na vesala kebu

✧ 8:12: Mak 12:43 ✧ 8:13-14: 2 Kol 9:12

aitoi i na laka we'e aitoi i na obu. ¹⁵ ✧ Tamu vona i 'eno'eno Yaubada yana Buki nageneye ta na ve'ivaivaita bega yada mia i na vesala faifaina i vo,

Tomotoganidi 'ani'ani bwaikina i kwakwa, kebu tamu i da luvegelaleni.

We'e tomotoganidi 'ani'ani siaina i kwakwa, 'asa'aiana 'adi 'etowava.”

Wata bani'odi ta na ve'ivaivaita yada 'anivelena-maimaiga 'waidiega bega yada mia i na vesala.

Taito i na nago me Kolinita 'waidie 'anivelena-maimaiga i na 'ewai.

¹⁶ 'A vekaiwa bwaikina Yaubada 'waineye fai yaku nuanuananina 'ami 'aivaita faifaina i ven-uayato Taito 'waineye bega taunina i tauyeni i na wai 'ami 'aivaita faifaina. ¹⁷ Tutuyanina

'a voneni i na wai 'waimie, ma yana sosoana i nogayema. I nogaya, siwe fai wata nuanuana bwaikina i na 'ivaisemi bega i na wai.

¹⁸ Wata iada tamu 'a na vetunei Taito taiadi, tomogonina ma 'ana ve'ililibu tovetumaganavo 'adi 'aila'a matatabuna 'waidie. I 'asetai taunina to-dumwebika Iesu Valana 'Atumaina 'ana lau'age 'waineye. ¹⁹ Kebu ve'ililibu 'aisena faifaina,

siwe wata tovetumaganavo i venua'ivineni nu-anuadi taiadi 'anivelena-maimaiga 'a na 'ewai 'a na naweni. De'e folovanina 'a 'i'idewai 'Auvea 'ana subia faifaina wata 'wainega 'wa na 'asetai nu-anuama 'a na 'ivaisemi. ²⁰ Yama nuanuananina 'a 'i'idewaiga ma fuema taiadi 'a na nagoi bega 'ama fata de'e 'anivelena-maimaiga bwaikina 'a

✧ 8:15: Sou 16:18

na 'i'isave'avini, kebu nuanuama tamu aitoi i na fali-vivinagoyema. ²¹ Nuanuama 'Auvea mataneyeye yama sauluva tonovidi mani 'ana 'isave'avina faifaina, kebu 'aisena mataneyeye, wata tomotoga matadie.

²² Wata iada tamu 'adi vetonu 'a voneni taiadi i na wai, tutuya fuei yana folova 'wainega 'a 'iseni 'a 'asetai taunina todumwebika nani fuei 'waidie. We'e tutuya de'e, fai i nuani mogitana 'wa na vematayakayaka nuanuana bwaikina i na 'ivaisemi. ²³ We'e Taito, taunina 'aku 'au taiadi 'a folofolova 'ami 'aivaita faifaina, we'e edavonidi 'adi 'ailuga taiadi i na waiga, taunidi tovetumaganavo 'adi 'aila'avo tutulidi, 'adi wagavayega i na wai, yadi folova tomotoga i na 'isedi Keliso i na subiai. ²⁴ ✧Taiadi 'wa na miamianiga 'wa na vevesauluva 'atumaina 'waidie nika i na 'asetai 'wa nuakalikaliedi, wata naninidi faifaidi 'a awa'ai'aimiga 'wa na 'i'idewadi nika tovetumaganavo 'adi 'aila'a tulina tulina i na 'isemi i na ve'awamogitana.

9

Yaubada nuanuana ma yada sosoana ta na 'anivelena-maimaiga.

¹⁻² ✧A 'asetami ma yami dumwebika nuanuami 'wa na 'anivelena-maimaiga tovetumaganavo 'adi 'aivaita faifaina, begaidi kebu i da lubwaineku faifaina a na kiluma manamanawena 'waimie. A awa'ai'aimi me Masidonia 'waidie a vo, Me Kolinita wata 'ifwaidi tovetumaganavo 'awalawa Gulisi nageneye taiadi, malamala i 'a'avaga

✧ 8:24: 2 Kol 7:13-14 ✧ 9:1-2: 2 Kol 8:1-7

'waineye yadi nuanua i 'idewai 'anivelena-maimaiga faifaina.” Yami dumwebika valana me Masidonia i nogai, nika sai'afo matatabudi wata i dumwebika 'anivelena-maimaiga faifaina. ³ Yama awa'ai'ainina kebu nuanuama i na vo, I vekali,” begaidi edavo 'adi 'aitonu a vonedi i na waia bega yadi 'aivaita 'wainega yami 'anivelena-maimaiga 'wa na yato. Tutuyanina 'a na wai 'a na 'isemi yami 'aivaitanina 'wa 'idewai i 'eno'eno, basenadi a vona bani'odi. ⁴ 'Ai'edi me Masidonia 'ifwaidi taiadi 'a da waiga 'waimie 'a da 'iseni kebu 'wa da yatoga 'ima 'a da bunumayaga 'a vetumaganemiga faifaina, we'e 'omi 'wa da bunumayagaotoga. ⁵ Fai kebu nuanuama ta na bunumayaga begaidi a nuanina edavo a vonedi i na kumeta i na waia bega yadi 'aivaita 'wainega yami 'anivelena-maimaiga basenadi faifaina 'wa vona'awaufaufa 'wa na 'idewai i na 'eno'eno. Mulieta tutuyanina 'a na waiga 'a na 'isenina nika 'a na 'asetai 'omi to'anivelena, we'e kebu nuanuaku 'a na wai 'a na lueloelomi.

Ta na yatoga bwaikina wata bwaikina ta na veluagai.

⁶ ☆'Ana 'asetai side bani'odi, 'ai'edi aitoi waifei siaina i na koyovi, wata 'aiala 'waineye 'ani'ani siaina i na veluagai. We'e 'ai'edi aitoi waifei bwaikina i na koyovi, wata 'aiala 'waineye bwaikina i na veluagai. ⁷ Begaidi i lubwaineni tomotoga 'aitamogana 'aitamogana yana nuanua 'waineye i tauyeniga bani'odi i na yato. Kebu ma yana nualolo 'wainega i na yato wata kebu lukakada 'wainega, we'e mogitana ma yana

☆ 9:6: Voa 11:24

sosoana i na 'anivelena, fai egavo ma yadi sosoana i 'a'anivelena, Yaubada i nuakalikali.

⁸ Naninidi 'waidie 'wa ve'ale'usa, Yaubada 'ana fata i na vevelemi nika tutuya matatabuna 'ami fata, siwe wata ma 'adi 'imoso'i bega 'ami fata 'waidiega tomotoga fuei 'wa na 'i'ivaisedi.

⁹ ✧ Tamu vona i 'eno'eno Yaubada yana Buki nageneye to'anivelena faifaidi i vo,

Yana nuakalikali fuei i luyavuyavuledi wekewekoma 'waidie.

Yana sauluvanidi tonovidi 'adi nuanua kebu i na 'a'avaga i na 'eno-vagata.”

¹⁰ ✧ Yaubada waifei i veleda bega 'ada fata ta na koyova, taunina 'adi tokiavevuaga nika 'ani'ani ta veveluagadi. Wata bani'odi Yaubada i na 'a'anivelena 'waimie wata naninidi i na 'i'imoso'iedi i na nagoga yami 'anivelena vuagidi i na vevebwaika. ¹¹ Yaubada i na

'i'ive'ai'aiwabumi nani matatabuna 'waidiega bega tutuya matatabuna 'wa na 'a'anivelena nika tomotoga fuei i na vekaiwa Yaubada 'waineye yami nuakalikalinidi faifaidi. Nuakalikalinidi 'a na 'ewadi 'waimiega mali tomotoga 'a na veledi.

¹² Yami 'anivelena-maimaiga 'wainega nani 'ailuga 'atumaidi i sousouyedi. Tamu, Yaubada yana tomotoga ava'ai 'waidie i 'usaga 'wa 'i'ivaisedi, 'ana veluaga, tomotoga fuei Yaubada 'waineye i vevekaiwa nuakalikalinidi faifaidi.

¹³ Tomotoga fuei yami 'anivelena-maimaiga i na 'iseni Yaubada i na subiai i na vo, Me Kolinita Keliso faifaina i lulu'ivona, siwe wata i vevematayakeyakeni. Yadi vematayakayanina

✧ 9:9: Same 112:9 ✧ 9:10: Ais 55:10; Ose 10:12

vuagina ta 'iseni i 'a'anivelena 'waideye wata mali tovetumaganavo 'waidie.”¹⁴ Tomotoganidi ma yadi nuakalikali i na vevelu'ui faifaimi fai 'ami nuakalikali bwaikaotogina Yaubada i velemiga, 'waidiega 'wa 'ivaisedi.¹⁵ We'e Yaubada, Natuna i 'aniveleneni 'waideye, yana nuakalikalinina bwaikaotogina kebu ta na vona, begaidi ta na subiai.

10

Faulo i veifufu me Kolinita 'waidie 'ana awavesako faifaina.

¹ ✧Ekwavo, yau Faulo, tauniotogiku a na vonemi. Keliso yana sauluva bikana wata yana nuaobu a na saladu, 'waidiega a na velu'ase'ase. Tomotoga 'ifwaidi i vo, Faulo taiadi ta miamiaga 'awana umaumana kebu i da toke i da vonavona, we'e tulinega kebu i da kolokolologa i toke i vonavona.”² ✧Siwe a nuani tutuyanina a na wai 'waimie, tomotoga 'ifwaidi taiadi 'wa miamianiga 'waidie a na toke a na vona, tomotoganidi yadi nuania igodina 'ima Yaubada yana tofолоvavo 'a da vevesauluva Yaubada 'ana tobavu bani'odi. A vevelu'ui 'waimie, kebu nuaniu 'wa na silubuku yami sauluva sakoidi 'waidiega i na nunago 'omi wata a na toke a na vonemi.³ Mogitana 'ima tomotogaotoga fwayafwaya tabwaneye ta miamiani, siwe Yaubada faifaina 'a vevetalaga sakona taiadi, we'e yama vetalaganina kebu Yaubada 'ana tobavu bani'odiga.⁴ ✧Kebu tomia fwayafwaya yadi

✧ 10:1: 1 Kol 2:3 ✧ 10:2: 1 Kol 4:21 ✧ 10:4: Efe 6:13-17

kukua 'eba vetalaga 'waidiega 'a da vevetalaga, we'e mogitana Yaubada yana 'eba vetalaga toketokedi 'waidiega 'ama fata Seitani yana 'eba veimea toketokedi 'waidie 'a na vetoketoke. Side bani'odi 'a vevetoketoke 'waineye. ⁵ Yaubada yana 'eba vetalaganidi 'waidiega fwayafwaya 'ana nuanua tomotoga nuadi i 'ewa'ewadiga 'a sisiviladi 'a vetoketoke 'waidie. Yaubada 'ana tovedumwe'ai'ai 'ana 'asetai i sibodeni nualaka tulina tulina 'waidiega bega mali tomotoga kebu 'adi fata Yaubada i na 'asetai, we'e 'ima naninidi i tovibodaga 'a tutuwealidi. Wata 'eba vetalaganidi 'waidiega tomotoga yadi nuanua matatabuna 'a 'i'ive'avinidi 'a nunawedi Keliso 'waineye nika yana nuanua i vevematayakeyakedi. ⁶ 'A lulukamata 'omi tovetumagana 'wa miamiani Kolinita 'waineye nagami taunimi 'wa na tauyemi Keliso 'wa na vevematayakeyakeni, mulieta 'ai'edi aitoi i na baila, bei vematavuloga 'a na veleni.

⁷ 'Wa 'ise'isekumo, 'ai'edi 'wa da venua'ivineku yaku sauluva wata yaku veimea 'wa da 'asetadi. 'Ai'edi aitoi i na nuani mogitana taunina Keliso yana tomotoga, 'atumaina, siwe i lubwaineni i na venua'ivina-vaitugana nika i na nuani 'ima wata Keliso yana tomotoga, kebu 'aisenaga. ⁸ 'Auvea veimea i velema bega 'a na kiavetoketokemi, kebu i da vo, 'Wa na 'ivesakodi," we'e 'ai'edi 'wa na vo, Faulo yana vonanina 'ana nogaya taunina i awa'ai'aia," kebu a na bunumayaga, fai mogitana Yaubada veimeanina i veleku begaidi a awa'ai'aiku. ⁹⁻¹⁰ ✧Kebu nuanuaku 'wa na vo, Faulo yana leta 'waidiega i veve'isakololoda," fai

✧ 10:9-10: Gal 4:12-14

'ifwaimi 'wa vonaga 'wa vo, Faulo yana leta vitadi wata toketokedi, we'e taiadi ta na miamiaga ta 'ise'iseni taunina tomogo mweana yana vona 'adi nogaya nani-'avo'avovo.” ¹¹ ✧Egavo bani'odi i voneyediga i lubwainedi i da 'asetai yama toketokena 'a veve leta 'waidiega wata yama toketokena tutuyanina 'a na waiga 'waimie 'wa na 'iseniga i vesala.

¹² Tove 'ifwaidi 'waimie taunidi i awa'ai'aidi i vo, 'Ima 'atumaima 'wa na ve'ililibuyema,” we'e 'ima, kebu tamu sai'afo nuanuama 'a na vo, Tomotoganidi yadi sauluva wata 'ima yama sauluva taiadi i vesala.” Tovenidi yadi nuanuayega taunidi yadi sauluva i 'etowavadi i vo, 'A ve'atumaiga, 'asa'aiana 'akonadi 'ama fata, kebu tamu aitoi yana 'atumaina 'ima bani'odiga.” 'Ana 'isa tomotoganidi kebu ma yadi 'asetaga. ¹³ ✧We'e 'ima 'eba veimea 'ifwaidi Yaubada i tauyedi 'waimeye beidimo 'a na folofolova faifaina, yama folovanidi vuagidi faifaidi 'ama fata taunima 'a na awa'ai'aima. Kebu 'a na uvi'agala 'a na damana tamu aitoi yana 'eba veimea 'waimeye bei taunima 'a na awa'ai'aima tomogonina yana folova vuagidi faifaidi. We'e 'omi me Kolinita yama 'eba veimea nageneye 'wa miamia. ¹⁴ Mogitana 'omi yama 'eba veimea nageneye, begaidi tutuyanina 'a wai-vauvau 'waimie Keliso Valana 'Atumaina 'a viweni, kebu yama 'eba veimea 'ana tugusa 'a da uvi'agali. ¹⁵ Yaubada yama 'eba veimea 'ana tugusa i yatodi, begaidi mali tomotoga i folofolova 'eba veimea 'ifwaidi 'waidie, yadi folova vuagidi faifaidi kebu taunima 'a na awa'ai'aima. We'e

✧ 10:11: 2 Kol 13:2,10 ✧ 10:13: Lom 12:3

mogitana nuanuama yami vetumagana i na vevetoketoke bega yama folova 'waimie yama 'eba veimeanina nageneye i na vevebwaika. ¹⁶ Yama folova i na vebwaikaga 'waimie, mulieta 'ama fata 'a na vaganago mali 'awalawa 'waidie wata bei Iesu Valana 'Atumaina 'a na lau'age. 'A na vaganagoga fai kebu nuanuama taunima 'a na awa'ai'aima tamu tomogo yana folova taunina yana 'eba veimea nageneye faifaina.

¹⁷ We'e mogitana ava'ai i voneyeniga Yaubada yana Buki nageneye ta na 'idewai i vo,

'Ai'edi aitoi i na vo, A na subia,”

I lubwaineni 'Auvea 'aisena i na subiai,

Kebu taunina i na awa'ai'aia.”

¹⁸ ✧ 'Ai'edi aitoi taunina i na awa'ai'aia, yana awa'ai'ainina nani-'avo'avovo, we'e 'ai'edi 'Auvea tamu aitoi i na awa'ai'aiaga 'ana awa'ai'ainina vona mogitana.

11

Faulo i veifufu tove-vekavekali faifaidi.

¹ Fai tauniku a awa'ai'aiku yaku vona 'ana nogaya 'wa da vo sai'afo a da ve'wava'wava, siwe nuanuaku 'wa na tokemaiga. 'Wa na tokemaigemiga, nuanuaku bwaikina yaku nuanua a na lu'ivona 'waimie. ² ✧ Yaubada i ve'unumagigi faifaimi, nuanuana 'omi 'aiseotogina yana tomotoga, yau wata bani'odi a ve'unumagigi faifaimi. Nuanuaku Keliso 'aiseotogina 'wa na nuakalikalieni, 'wa da vo 'omi tamu vavine ne'e/elina bani'odi, kebu tamu yana sakonaga. A veakutagonimi Keliso

✧ **10:18:** 1 Kol 4:4-5 ✧ **11:2:** Efe 5:26-27

'aiseotogina faifaina, 'omi bani'odi yana vavine 'atumai'avami. ³ ✧ Siwe a venuafouviga faifaimi. Basenadiotoga Seitani 'o'olo i agei bega 'asetavekavekali 'wainega Ive i vekaliedi i sakona, wata bani'odi 'omi faifaimi a venuafouviga i na nunago tomotoga 'ifwaidi i na vekaliemi Keliso 'wa na baileni. Basenadi ma yami nuakalikali taunimi 'wa tauyemi Keliso 'aiseotogina 'waineye, kebu nuanuaku tamu aitoi nuami i na 'ewai 'wa na damana 'waineye. ⁴ ✧ A venuafouviga fai tove-vekavekali i waiga 'waimie, ma yami sosoana taunimi 'wa tauyemi 'waidie. Basenadi Iesu Valana 'Atumaina 'a lau'age 'waimie, 'wa vetumagana nika 'Anu'anunu 'Atumaina i agemi. Mulieta tove-vekavekalinidi i waia 'waimie tamu Iesu faifaina i lau'age, kumanina 'ima kebu faifaina 'a da lalau'agega. Yadi ve tulina siwe ma yami sosoana 'wa nogai 'wa vetumagana 'waineye wata taunimi 'wa tauyemi tamu 'anu'anunu tulina 'waineye.

⁵ Tovenidi igodi yami tomata'aulele bwaikaotogidi, we'e yau a nuani kebu i da vebwaika'iaweku. ⁶ ✧ Voke yaku vona 'ana nogaya kebu 'eba nua'ewa tovenidi bani'odi, 'wa da vo kebu a da luku sikulu 'waineye, siwe a vonavonaga ma yaku 'aseta. Tutuya matatabuna yaku 'aseta 'a sisivemageseni 'waimie nani tulina tulina faifaiddi.

⁷ Basenadi a wai Yaubada Valana 'Atumaina a lalau'age 'waimie, kebu tutula faifaina a da nuanua, mani 'alo 'ani'ani 'waimiega a da 'ewa'ewadi. Tauniku a kiaobuyeku ma'itufa 'omi a kialakaimi. Fai kebu a da lukakademi

tutula faifaina, 'wa da nuani, a sakona matamie?
 8 ✨A folofolovaga 'waimie tovetumagana 'aila'a
 fueদি i 'i'ivaiseku mani 'wainega, 'wa da vo a da
 vavainago 'waidiega a na 'ivaisemiga faifaina.
 9 Tutuyanina taiadi ta miamia nani 'ifwaidi
 'waidiega a ve'ale'usa, siwe kebu tamu vita
 a da velemiga talavelu'uega. We'e mogitana
 edavo i maia Masidoniayega, naninidi 'waidiega
 a ve'ale'usaga i miedi. Basenadi wata 'awaie
 kebu tamu sai'afo nuanuaku vita a na velevelemi
 'aku 'isave'avina faifaina. 10 Keliso yana nuanua
 tonovidi i 'eno'enovi 'waikuye begaidi a na
 vonemi. Tutuyanina Keliso Valana 'Atumaina
 a lalau'age 'waimie kebu tamu nani nimamiega
 a da 'ewai. Kebu tamu ava'ai a da 'ewa'ewai
 'waimiega, faifaina tutuya fueদি tauniku a
 awa'ai'aiku yami 'awalawa Gulisi matatabuna
 nageneye, siwe kebu tamu aitoi 'ana fata i na
 talabodeku a na 'ailove. 11 Awale a vonavona a vo,
 Mali tovetumaganavo i 'ivaiseku we'e 'omi kebu?"
 'Alo 'omi kebu a da nuakalikalimiga? Kebu,
 Yaubada 'aku to'aseta, i 'asetaku a nuakalikaliami.
 Wata kebu a da vo, A na vetalavologa bega mani i
 na veleku."

12 Tutuya de'e a folofolovamo kebu tutula
 faifaina a da nuanua, wata 'awaie bani'odi a
 na folofolovamo bega tomotoganidi igodi yami
 tomata'aulelevo kebu 'adi fata taunidi i na
 awa'ai'aidi. Tomotoganidi i lulukakademi mani
 'wa veleveledi yadi nuanua i vo, 'Ima Yaubada
 yana tomata'aulele, Paulo yana folova wata 'ima
 yama folova i vesala." Siwe kebu, yau kebu
 mani faifaina a da nuanua, begaidi kebu i da

✨ 11:8: Fil 4:15-18

lubwainedi taunidi i na awa'ai'aiidi i na vo, 'Ima 'a vesala Faulo taiadi.”

¹³ ✧ Tomotoganidi kebu tomata'aulele mogitana, tovekali. Yadi folova vekali wata yadi sauluva i vetuli ta na 'isedi ta na vo 'ako, Mogitana Keliso yana tomata'aulelevo.” ¹⁴ Kebu nuami i na voganidi 'wa na vekoi fai yadi toveimea Seitani 'ana fata i na vemaigisivilavila 'ana 'isa 'wa da vo anelose mataududulina. ¹⁵ Fai Seitani 'ana fata i na vetuli anelose bani'odi, bega kebu nani vitana yana tofолоvavo 'waidie, wata 'adi fata i na vetuli 'wa da vo nuanua tonovidi 'adi tofолоvavo. 'Eba ve'a'ava 'waineye 'adi tutula i na veluagadi yadi sauluva sakoidi 'adi 'isa'isa bani'odi.

Vitanidi Faulo i veluagadiga Keliso faifaina i veifufuyedi.

¹⁶ Wata yaku vona a na luvaitugani. Kebu i da lubwaineni tamu aitoi yana nuanua i na vo, Faulo taunina i awa'ai'aia, yana vona 'ana nogaya i ve'wava'wava.” 'Ai'edi yami nuanua bani'odi, 'wa na tokemaigemi sai'afo a na awa'ai'aiku 'wa na nogai, bani'odi 'wa totokemaiga tomotoganidi i ve'wava'wavaga 'waidie. ¹⁷ Yaku awa'ai'ainina kebu 'Auvea yana nuanua bani'odiga, 'wava'wavadi yadi sauluva a na saladi. ¹⁸ Tomotoga fuedi taunidi i awa'ai'aiidi 'adi 'aivaita fwayefwayeye faifaina wata yau a na saladi. ¹⁹ 'Ami 'isa, igodina 'omi to'asetasiwe 'wa tokemaiga tove-vekavekali 'waidie. Tovenidi yadi vona 'ana nogaya i ve'wava'wava siwe ma yami sosoana taunimi 'wa tauyemi 'waidie. ²⁰ 'Ai'edi aitoi i na lukakademi yana

veimea fuedi 'wa na vevematayakeyakedi, 'alo yami kukua i na elomi, 'asa'aiana 'wa tokemaiga. 'Alo 'ai'edi givagivayega i na vekaliemi nuanuana yana nuanua 'wa na 'i'idewadi, 'alo i na awaobuobuyemi, 'alo maigimi i na tutubodadiga, 'asa'aiana 'wa sosoanamo. ²¹ Fai 'ima kebu bani'odi 'a da vesauluva sakoina 'waimie, yau 'wa da vo mweaku, igodi a bunumayaga.

'Ai'edi tamu aitoi i na vetoketoke taunina i na awa'ai'aia nani 'ifwaidi faifaidi, yau wata bani'odi 'aku fata tauniku a na awa'ai'aiku naninidi faifaidi. A 'asetai yaku awa'ai'ai 'ana nogaya a ve'wawa'wawa, siwe wata a na vonemi. ²² ✧ 'Ai'edi tomotoganidi i na vo, 'Ima me Ibeliu," yau wata tomogo Ibeliu. 'Ai'edi i na vo, 'Ima wauma Isileli," yau wata bani'odi. 'Ai'edi i na vo, 'Ima Ebelamo tubunavo," yau wata bani'odi tamu tubuna. ²³ ✧ 'Ai'edi i na vo, 'Ima Keliso yana tofolova," we'e yau mogitana yana tofolova. A nuani yaku awa'ai'ainina 'ana nogaya 'wa da vo a da ve'wawa'wawa, siwe wata a na vonemi. Yaku folova vitadi wata Keliso faifaina vanuga 'eba yogona 'waidie i yatoyatoku 'waidiega tomotoganidi a vetoketoke-'iawedi. Tutuya fuedi Keliso 'ana tovedumwe'ai'ai i toke i nikenikeku, wata tutuya fuedi sai'afoga i da luluvewafaku, we'e tomotoganidi kebu bani'odiga. ²⁴ ✧ Fai a folofolova Keliso faifaina, tutuya 5 yaku tomotoga me Diu i toke i fitaliku bulava metametanina 'wainega, tutuya 'aitamogana 'aitamogana 'aku 'ainike matatabuna 39 me Diu yadi sauluva

✧ 11:22: Fil 3:5 ✧ 11:23: Fol 16:23 ✧ 11:24: VeL 25:3

bani'odi. ²⁵ ✧ Tutuya 'aitonu me Loma i toke i nikeku fulumaiega, tamu tutuya i lukileuku igodi nuanuadi i na luvewafaku. Tutuya 'aitonu yama waka i tula i tutuwealema, tamu tutuya a kayokayo malaveseye 'aiata wata lovana matatabuna. ²⁶ ✧ Tutuya fueidi yaku lauvivila 'waidie ilagi a veveluagadi sai'afoga a da wafawafa weyagata 'waidie. To'ainike 'waidiega, yaku tomotoga me Diu 'waidiega wata mali tomotoga taunidi kebu Diu 'waidiega. Wata bani'odi ilagi a veveluagadi 'atamana bwaikidi 'waidie, wala'aie, malaveseye wata tovetumagana-vekavekali 'waidiega. ²⁷ Tutuya fueidi a toke a folofolova, lovana fueidi kebu a da 'enodewa, a laselase wata 'anigoku i lalala, tutuya fueidi a veve'ale'usa 'ani'ani wata kaleko 'waidiega, wata a vevekaukau. ²⁸ Vita fueidi a veluagadi, 'ifwaidi a 'inanadi, 'ifwaidi kebu, vitanidi 'waidiega yami tove-vekavekali a vetoketoke-'iawedi. Siwe wata tamu vita bwaikina a vevebaeku tovetumaganavo faifaimi 'awalawa tulina tulina 'waidie, 'aiata 'aitamogana 'aitamogana a vevenuafouviga faifaimi voke yami vetumagana Keliso 'waineye fa'alina 'alo kebu. ²⁹ 'Ai'edi tamu aitoi yana vetumagana i na mwea, 'aku vebae 'wainega a na lutonovi. 'Ai'edi tamu aitoi sakona nuana i na 'ewai i na be'uga, yau a na venuafouviga faifaina.

³⁰ 'Ai'edi aitoi i na vo, I lubwaineni Faulo taunina i na awa'ai'aia nika tomotoga i na 'asetai taunina tomogo toketokena.” Siwe kebu nu-

✧ 11:25: Fol 16:22, 14:19 ✧ 11:26: Fol 9:23, 14:5

anuaku, nuanuaku 'aku vitanidi wata naninidi 'waidiega tomotoga 'adi fata i na 'asetakuga yau tomogo mweaku, 'aisedi faifaiddi a na vonavona. ³¹ Yaubada 'aku to'aseti, i 'asetaku kebu a da vevekali. Taunina 'ada Toveimeia Iesu Tamana wata yana Yaubada, i lubwaineda tutuya fueidi ta na subisubiai, kebu i na 'a'avaga, i na 'eno-vagata. ³² ✧ Yau tomogo mweaku, a na veifufuyeni nika 'wa na 'asetai. Basenadi Kini Ale-tasi tamu gabemani bwaikina i venua'ivinini 'atamana Damasiko i 'isave'avini. 'Atamananina matatabuna kalikalina, kalinina i toke i didigi i laka. Bei a miamia toveimeanina nuanuana i na 'ive'aviniku bega tolugaviavo i vonedi 'awa i tovibodadi. ³³ Siwe lovane ekwavo i naweku walisaveye a luku, tutubwekanemo i ve'ioyoku a obu a dega.

12

Faulo 'ana 'enoneganega i veifufuyeni, 'wa da vo tamu tomogo 'ana 'enoneganega i da veifufuyeni.

¹ A nuani kebu 'ana fata 'aivaita a na veluagai yaku awa'ai'ai 'wainega siwe 'asa'aiana a na awa'ai'aiku nika 'wa na 'asetai ma yaku veimeia Yaubada 'wainega. Tutuya de'e a na veifufuyedi naninidi 'Auvea i veku 'wa da vo a da 'enoneganega. ² 'Akonadi malamala 14 i 'a'ava tamu tomogo taunina Keliso taiadi i miave'itubamaga, Yaubada i vagavaia i naweni ta'ebeiotoga abame. Kebu a da 'asetai-atumaia ma tomogona 'alo 'anu'anunu'avana, Yaubada 'aisena i 'asetai. ³ Wata a na luvaitugani,

Yaubada 'aisena i 'asetai, voke ma tomogona 'alo 'anu'anununa 'aisena, siwe a 'asetai Yaubada i vagavaia i naweni Faladaisi, 'eba mia 'atumaina wata sosoana-vagata 'waineye. ⁴ I lakaga nani fuedi 'eba nua'ewa i nogaidi veifufu-wayoga, siwe Yaubada tomogonina i talabodeni kebu i na lu'ivoneyedi. ⁵ 'Aku fata tomogonina* a na awa'ai'aia, siwe kebu nuanuaku tauniku a na awa'ai'aiku. We'e naninidi faifaidi tomotoga i 'asetaku yau tomogo mweaku 'aisedi faifaidi a na vonavona. ⁶ 'Ai'edi nuanuaku tauniku a na awa'ai'aikuga kebu a da ve'wawa'wavaga fai naninidi a da lu'ivoneyediga vona mogitana. Siwe 'asa'aiana kebu nuanuaku tauniku a na awa'ai'aiku i na nunago tomotoga i na kialakaiku tauniku yaku vona 'wainega. We'e mogitana tomotoga i na 'iseni ava'ai a 'idewaiga wata i na nogai yaku lau'age nika bei i na nuani yau tomogo-'avo'avovo 'alo bwaikiku.

⁷ ✧ Tutuyanina Yaubada i silakaiku abame 'eba nua'ewa 'atumaotogidi tulina tulina i veku, fai kebu nuanuana faifaidi a na nualaka begaidi Yaubada Seitani i tauyeni tamu vita tomogokuye i yatoi, 'wainega veviga wata 'we'wela a veveluagadi. ⁸ Tutuya 'aitonu viganina faifaina a vevelu'ui 'Auvea 'waineye, nuanuaku i na 'ewayavuleni. ⁹ ✧ Siwe i vo, Yaku nuakalikali 'waimuye 'akonadi 'amu fata 'wainega 'aivaita 'u veveluagai. Tutuyanina 'u na mwea yaku toketokena i na 'ivaitemu nika 'u na vetoketoke." Begaidi a sosoana bwaikina naninidi 'waidiega

* **12:5:** Tomogonina 'asa'aiana Faulo. ✧ **12:7:** Iob 2:6 ✧ **12:9:** Fil 4:11-13

a mwea, faifaidi a na awa'ai'aiku. A mweaga bega Keliso yana toketokena i na ageku i na veve'isabodeku. ¹⁰ 'Ai'edi Keliso faifaina a na mweaga, 'ai'edi tomotoga i na yagayagaikuga, 'ai'edi 'eba venuafouviga a na veveluagadiga, 'ai'edi Keliso 'ana tovedumwe'ai'ai i na veve'isakolologa 'waikuye, 'ai'edi vita tulina tulina a na veveluagadiga, a na sosoanamo. A na sosoanaga fai tutuyanina a na vo, Yau a mwea, kebu 'aku fata,” bei Keliso i na kiavetoketokeku nika vitanidi matatabuna 'aku fata.

Faulo i venuafouviga me Kolinita faifaidi.

¹¹ Fai yami tomata'aulele-vekavekali 'wa awa'ai'aidi tauniku a awa'ai'aiku yaku sauluva 'wa da vo a da ve'wava'wava, siwe 'omi yami awa'ai'ainina 'wainega 'wa lukakadeku. Yau a vetomata'aulele Keliso faifaina 'waimie a folova, begaidi 'omi tomotoganimi i lubwainemi awave'atumai 'waimiega i da souyeni faifaiku. Avinodi yau bani'odi nani-'avo'avovo siwe tomotoganidi igodi yami tomata'aulele bwaikaotogidi kebu tamu sai'afo i da vebwaika-'iaweku. ¹² ✧A tokemaiga bwaikina vetomata'aulele 'ana tugusa a ve 'waimie. Yaubada yana toketokena 'wainega 'eba nuavogana wata 'eba nua'ewa ma 'adi tugusa a 'idewadi matamie kebu tamu wata aitoi 'ana fata bani'odiga, 'wa da 'isedi nika 'wa da 'asetai yau tomata'aulele mogitana. ¹³ ✧Naninidi a 'idewadi tovetumaganavo 'adi 'aila'a 'ifwaidi 'waidie, 'omi wata 'waimie bani'odi, kebu tamu nani a da ve'o'oleni 'waimie. Voke tamu nani a ve'o'oleni,

mali tovetumaganavo a tauyedi i na 'i'ivaiseku we'e 'omi kebu a da lukakademi 'ani'ani 'alo tamu nani faifaina. 'Ai'edi 'wa nuani yaku sauluvanina 'wainega a sakonaga 'waimie, nuanuaku 'wa na nuatavuniku.

¹⁴ Tutuya de'e yaku wai 'ana vetonu faifaina a 'idewadewa a na wai a na fogemi, siwe kebu vita a na velemiga 'aku 'isave'avina faifaina. Naninidi 'waimiega bani'odi kukua kebu nuanuaku, nuanuaku 'omi tauniotogimi. 'Omi natukwavo 'wa na 'i'isave'avinikuga kebu i da lubwaineni fai kwakwama kebu i da bakubakula tamadiavo wata inadiavo faifaiddi, we'e mogitana tama wata ina i bakubakula natudiavo faifaiddi. ¹⁵ Yau tamamii bani'odi, ma yaku sosoana nani matatabuna 'waikuye a tauyedi faifaime tauniotogiku taiadi bega a na toke a na folofolova faifaime. I na nunago a na mwea faifaime, 'asa'aiana a na sosoanamo. Yau a nuakalikiemi bwaikina, we'e 'omi bani'odi, yami nuakaliki 'waikuye i vevesiai? ¹⁶ 'Ai'edi 'wa na vo, Mogitana, Faulo kebu vita i da veleda 'ana 'isave'avina faifaina," siwe 'ifwaimi 'wa na vo, Kebu, Faulo yana vaiseba, yana vetalavologa 'wainega yada mani i eloeloda." ¹⁷ Bani'odi a munega a elomi? Tomotoganidi a vonedi i wai 'waimie yaku vona i lu'ivona 'waimie, voke 'waidiega a elomi? ¹⁸ Basenadi Taito a vetunei i wai 'waimie, wata iada tamu a voneni taiadi i wai. Voke Taito kumanina yami mani i elomi? Kebu'a'ava, 'wa 'asetai taunina tomogo 'atumaina, we'e yau yaku sauluva wata yaku nuanua i vesala yana sauluva wata yana nuanua bani'odi.

¹⁹ Voke yaku leta 'wa lulu'iawawai 'wa nuanua

'wa vo, Faulo ma enavo i veve'ewa 'waideye taunidi 'adi awave'atumai 'waidiega.” Siwe kebu, Yaubada mataneyeye 'a vonavona Keliso yana nuanua bani'odi. We'e 'omi emavo 'a nuakalikiemiga, yama sauluva matatabuna 'a 'i'idewadi 'ami kiavefa'ala faifaina. ²⁰ Nuanuama 'a na kiavefa'alimi fai a venuafouviga a na waiga 'waimie yami sauluva 'ifwaidi a na 'isedi, sauluvanidi kebu yaku nuanua bani'odi, wata yau ava'ai a na 'idewaiga 'waimie, 'omi kebu nuanuami. A venuafouviga 'ai'edi a na 'isemi 'wa na veve'ikwayekwayega, 'wa na veve'unumagigi, 'wa na nunuasako, tauni'avami faifaimi 'wa na nuanua we'e emiavo kebu, emiavo 'wa na yagayagaidi, 'wa na vevebonaivo, 'wa na nunualaka, wata kebu 'wa na folofolova veimea 'ana tonovineamo. ²¹ ✧Mogitana a venuafouviga tutuyanina wata a na wai 'waimie 'ai'edi yami sauluva a na 'isedi bola kebu 'wa da 'ive'atumaidi, nika yami sauluvanidi faifaidi yaku Yaubada bunumayaga i na veleku matamie. Basenadi fuemi 'wa sakona, siwe voke bola kebu 'wa na nuavilamiga, bunu 'ana nuanua sakoidi 'wa 'i'idewadi, 'wa veve'avula-'avo'avovo, wata 'wa nunuagiva nika nani sakoidi 'wa 'i'idewadi. Yau a na 'isedina a na vemogai faifaimi.

13

Faulo yana matakia.

¹ ✧De'e a na wai a na fogemiga, yaku wai 'ana vetonu. Tamu vona i 'eno'eno Yaubada yana Buki nageneyeye faifaina nuami a na tolinuata'idi. I vo,

'Ai'edi tamu aitoi iana i na vevitai tamu sakona faifaina,

I lubwaineni sakonanina 'ana to'isa 'adi 'ailuga 'alo 'adi 'aitonu nika yana vevitanina mogitana.”

Wata bani'odi, 'omi 'ai'edi kebu 'wa na nuavilamiga 'wa na vonayavuga matakuye. ² Basenadi yaku wai 'ana veluga 'waineye, tomotoganidi i sakonaga wata 'ifwaimi a vonemi vematavuloga faifaina, we'e tutuya de'e tulikuyega wata vonanina a na luvaitugani. Side bani'odi. Tutuyanina wata a na waiga tosakonanimi kebu a na ve'ise'isemiga, 'aitamogana 'aitamogana vematavuloga a na velemi. ³ Nuanuami 'eba 'isa 'ifwaidi a na 'idewadi 'wa na 'isedina 'wa na ve'awamogitana yau Keliso yana tomata'aulele, Kelisonina faifaina a vonavona. 'Atumaina, a na waiga a na vemi vematavuloga a na velemiga 'wainega. Keliso yana sauluva 'waimie kebu mweanaga, we'e mogitana ma yana toketokena i folofolova 'awasasamie. ⁴ ✧Mogitana Keliso tomogona mweana i tutufwaseni 'ai lagalagana 'waineye i wafa, siwe tutuya de'e Yaubada yana toketokena 'wainega i miamia. Wata bani'odi 'ima Keliso yana tomotoga mweama, siwe Yaubada yana toketokena 'wainega taiadi 'a miamia bega 'ama fata nani matatabuna 'a na 'i'idewadi 'waimie ma yama toketokena.

⁵ We'e 'omi, i lubwainemi taunimi 'wa na sitonovimi 'wa na 'asetai ma yami vetumagana 'wa tauyemi Keliso 'waineye 'alo kebu. 'Wa da 'asetai Iesu Keliso i miamia nagemie, siwe

✧ 13:4: Fil 2:7-8

'ai'edi yami saitonovanina 'wainega 'wa na 'asetai kebu 'wa da vetumagana, wata 'wa na 'asetai Keliso kebu nagemie i da miamia. ⁶ We'e 'ima 'a nuani 'wa na 'asetama kebu tomata'aulele-vekavekali, nagemeye Keliso i miamia. ⁷ 'A vevelu'ui faifaimi Yaubada 'waineye bega kebu 'wa na sakona. Kebu 'a da vo, 'A na velu'ui faifaidi bega mali tomotoga yadi sauluva 'atumaidi i na 'isedi i na vo, Faulo ma enavo tomata'aulele mogitana.” Kebu bani'odi yama nuanuaga, mogitana 'a vevelu'ui faifaimi, nuanuama 'wa na vevesauluva 'atumaina, we'e 'ai'edi tomotoga i na awavesakoyema, 'asa'aiana, kebu tamu ava'ai. ⁸ ✧ 'Ima tomata'aulele kebu tamu yama toketokena i da 'eno'eno bega Yaubada yana nuanua tonovidi 'a na tovibodedi, we'e mogitana i lubwainema tutuya fuedi nuanuananidi 'a na lulu'ivoneyedi bega tomotoga i na vematayakeyakedi. ⁹ 'Ai'edi 'ama 'isa 'wainega 'ima tomotoga mweama we'e 'omi ma yami toketokena Yaubada yana nuanuananidi 'wa 'i'idewadi, 'a sososoana. Begaidi 'a vevelu'ui faifaimi yami sauluva i na ve'atumaiotoga. ¹⁰ ✧ Nuanuama yami sauluva i na ve'atumaiotoga begaidi tulikuyega yami leta a kilukiluma bega a na waiga 'waimie kebu ma yaku veimea a na vematavulogimi. Veimeanina 'Auvea i velekuga 'wainega a na kiavetoketokemi, we'e kebu i da vo, 'Wainega 'wa na 'ivesakodi.”

Faulo yana vona 'eba ve'a'ava.

¹¹ Side bani'odi yaku veifufu 'ana ma'usa 'waimie, ieu ekwavo. Yami sauluva 'wa na

✧ 13:8: 1 Kol 13:6 ✧ 13:10: 2 Kol 2:3-4

'i'isave'avinidi tonovidi i na 'eno'eno, yaku vona 'wa na nunuave'avinidi wata 'wa na 'i'idewadi, matatabumi yami nuanua i na vesala 'wa na veveiana. We'e Yaubada, taunina i nunuakalikali wata nuanua bikana mia 'atumaina taiadi i vevelede, lilivamie i na miamia.

¹² Emiavo tovetumaganavo 'waidie yami nuakalikali 'wa na ve 'avalamaigayega. Yaubada yana tomotoga matatabudi yadi vekaiwa i vetunei 'waimie.

¹³ 'Ada Toveimea Iesu Keliso yana 'isave'avina, Yaubada yana nuakalikali wata 'Anu'anunu 'Atumaina yana veiana i na 'eno'eno matatabumi 'waimie.

'Asa'aiana bani'odi.
Yau Faulo.

YAUBADA YANA VONA'AWAUFAUFA 'IVAUNA
The New Testament in the Iamalele Language of Papua
New Guinea

Nupela Testamen long tokples Iamalele long Niugini

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files dated 9 Oct 2020

db771331-f438-5051-a7d5-80ea6197c078